

九天應元雷聲普化天尊說玉樞寶經

發爐讚

爐煙起篆 道氣騰祥 誠心一炷噴天香  
繚繞透穹蒼 周遍十方 諸神現金光  
太上玉華散景香雲浮蓋大天尊。。

祝香神咒

道由心學 心假香傳 香爇玉爐  
心存帝前 真靈下盼 仙佩臨軒  
臣今關告 逕達九天

淨口神咒

丹朱口神 吐穢除氛 舌神正倫  
通命養神 羅千齒神 卻邪衛真  
喉神虎賁 氣神引津 心神丹元  
令我通真 思神鍊液 道心長存

淨心神咒

太上台星 應變無停 驅邪縛魅  
保命護身 智慧明淨 心神安寧  
三魂永久 魄無喪傾

淨身神咒

靈寶天尊 安慰身形 弟子魂魄

五臟玄冥 青龍白虎 隊仗紛紜  
朱雀玄武 侍衛我身

安土地神咒

元始安鎮 普告萬靈 嶽瀆真官  
土地祇靈 左社右稷 不得妄驚  
回向正道 內外澄清 各安方位  
備守家庭 太上有命 搜捕邪精  
護法神王 保衛誦經 皈依大道  
元亨利貞大聖元始安鎮天尊。。

淨天地神咒

天地自然 穢氣分散 洞中玄虛  
晃朗太元 八方威神 使我自然  
靈寶符命 普告九天 乾羅答那  
洞罡太玄 斬妖縛邪 殺鬼萬千  
中山神咒 元始玉文 持誦一遍  
卻鬼延年 按行五嶽 八海知聞  
魔王束首 侍衛我軒 凶穢消散  
道氣長存 皈命  
常清常靜天尊  
攝魔攝穢大天尊。。

金光神咒

天地玄宗	萬氣本根	廣修億劫
證吾神通	三界內外	惟道獨尊
體有金光	覆映吾身	視之不見
聽之不聞	包羅天地	養育群生
誦持一遍	身有光明	三界侍衛
五帝司迎	萬神朝禮	役使雷霆
鬼妖喪膽	精怪亡形	內有霹靂
雷神隱名	洞慧交徹	五氣騰騰
金光速現	覆護真人	急急如

清微藏書閣

玉皇光降律令敕

開經讚

貞明大聖 十方化形 運心三界統雷霆

誓願拯生靈 宣說寶經 萬類悉提醒

皈命

雷聲普化大天尊

啟請

神霄雷祖帝 九天普化尊

談道趺九鳳 持法騎麒麟

統攝聖獄將 掌令判雷霆

三辛逢初六 察人善惡情  
消災並度厄 稱名誦寶經

### 雷尊寶誥

高上神霄玉清真王 南極長生朱陵上帝  
太陽九龍皇君 南昌受鍊真人 玄都  
九嶷九夷滄水使者 九天採訪使 應元  
保運神化昭順真君 焮火大元帥 律令  
大神 炎帝天君 元始祖劫 一炁分真  
太乙雷聲普化天尊  
九天應元雷聲普化天尊說玉樞寶經

清微藏書閣

爾時

九天應元雷聲普化天尊 在玉清天中  
與十方諸天帝君 會於玉虛九宮之殿  
鬱蕭彌羅之館 紫極曲密之房 閱  
太幽碧瑤之笈 考洞微明晨之書 交  
頭接耳 細議重玄 諸多陪臣 左右  
踟蹰 天尊宴坐 朗誦洞章 諸天帝  
君 長吟步虛 綵女仙姝 散花旋繞  
復相引領 遊戲翠宮 群仙導前  
先節後鉞 龍旂鸞輅 飄颻太空 並

集於玉梵七寶層臺 時有 雷師皓翁  
於仙眾中 越班而出 面  
天尊前 頰顛作禮 勃變長跪 上白  
天尊 言 天尊大慈 天尊大聖 為群  
生父 為萬靈師 今者諸天 咸此良  
覲 適見  
天尊 閱寶笈 考瓊書 於中秘蹟 不  
可縷計 惟有玉霄一府 所統三十六  
天 內院中司 東西華臺 玄館妙閣  
四府六院 及諸有司 各分曹局

清微藏書閣

所以總司五雷 天臨三界者也  
天尊至皇 心親庶政 此等小兆 以何  
因緣 得以趨服 願告欲聞  
天尊言 雷師皓翁 爾等仙卿 儲勳夙  
世 累行昨生 故得玉府登庸 瓊宮  
簡錄 今茲勳行 視夙昨多 爾其悉  
力雷司 委心火部 日復日 歲復歲  
勳崇行著 性霽神融 克證高真  
即階妙道 惟是雷部鬼神 晝勞夕役  
動有捶楚 大則考戮 屑雲雕雪

無有已時 檄龍命鴉 此息彼作 彼  
所因故 爾其耳焉 雷師皓翁 及諸  
天諸仙 聳耳而默  
天尊所坐九鳳丹霞之宸 手舉金光明之  
如意 琅風清微 綺雲郁麗 天尊寂  
然良久

天尊言 吾昔於千五百劫以先 心逢此  
道 遂位上真 意釀此功 遂權大化  
嘗於

大羅元始天尊前 以清淨心 發廣大願

清微藏書閣

願於未來世 一切眾生 天龍鬼神  
一稱吾名 悉使超渙 如所否者  
吾當以身身之 爾等洗心 為爾宣說  
天尊言 爾諸天人 欲聞至道 至道深  
窈 不在其他 爾既欲聞 無聞者是  
無聞無見 即是真道 聞見亦泯  
惟爾而已 爾尚非有 何況於道 不  
聞而聞 何道可談  
天尊言 道者以誠而入 以默而守 以  
柔而用 用誠似愚 用默似訥 用柔

似拙 夫如是 則可與忘形 可與忘  
我 可與忘忘 入道者知止 守道者  
知謹 用道者知微 能知微則慧光生  
能知謹則聖智全 能知止則泰定安  
泰定安則聖智全 聖智全則慧光生  
慧光生則與道為一 是名真忘 惟  
其忘而不忘 忘無可忘 無可忘者即  
是至道 道在天地 天地不知 有情  
無情 惟一無二  
天尊言 吾今於世 何以利生 為諸天

人 演此妙寶 得悟之者 俾躋仙阼  
學道之士 信有氣數 夫風土不同  
則稟受自異 故謂之氣 智愚不同  
則清濁自異 故謂之數 數繫乎命  
氣繫乎天 氣數所囿 天命所梏  
若得真道 愚可以智 濁可以清 惟  
命俾之 愚昏昏 濁冥冥 亦風土稟  
受之移之 天地神其機 使人不知  
則曰自然 使知其不知 則亦曰自然  
自然之妙 雖妙於知 而所以妙

則自乎不知 然於道 則未始有以  
愚之濁之 諸天聞已 四眾咸悅  
天尊言 吾今所說 即是玉樞寶經 若  
未來世 有諸眾生 得聞吾名 但冥  
心默想 作是念言  
九天應化雷聲普化天尊 或一聲 或五  
七聲 或千百聲 吾即化形十方 運  
心三界 使稱名者 咸得如意 十方  
三界 諸天諸地 日月星辰 山河草  
木 飛走蠢動 若有知 若無知 天

清微藏書閣

龍鬼神 聞諸眾生 一稱吾名 如有  
不順者 馘首刳心 化為微塵  
天尊言 吾是九天貞明大聖 每月初六  
及旬中辛日 監觀萬天 浮遊三界  
若或有人欲學道 欲希仙 欲追九  
玄 欲釋三災 當命清微正一道士  
或自同親友 於樓觀 於家庭 於里  
社 酌水饋花 課誦此經 或一過  
三五過 乃至數十百過 即得神清氣  
爽 心廣體胖 凡所希求 悉應其感

天尊言 身中九靈 何不召之 一曰天  
生 二曰無英 三曰玄珠 四曰正中  
五曰子丹 六曰回雷 七曰丹元  
八曰太淵 九曰靈童 召之則吉 身  
中三精 何不呼之 一曰台光 二曰  
爽靈 三曰幽精 呼之則慶 五心煩  
懣 六脈搶攘 四肢失寧 百節告急  
宜誦此經  
天尊言 若或有人 五行奇蹇 九曜嶽  
靄 年逢刑衝 運值剋戰 孤辰寡宿

清微藏書閣

羊刃劍鋒 劫殺亡神 鬼門鈎絞  
祿曹破敗 馬落空亡 動用凶危 行  
藏坎壑 即誦此經 上請  
天官解天厄  
地官解地厄  
水官解水厄  
五帝解五方厄 四聖解四時厄  
南辰解本命厄 北斗解一切厄  
天尊言 沉疴伏枕 痼疾壓身 積時弗

瘳 求醫罔效 五神無主 四大不收  
或是五帝三官之前 泰山五道之前  
日月星辰之前 山林草木之前 靈  
壇古蹟之前 城隍社廟之前 里巷井  
灶之前 寺觀樓塔之前 或地府三十  
六獄 冥官七十二司 有諸冤枉 致  
此牽纏 或盟詛咒誓之所招 或債垛  
負債之所致 三世結釁 異劫興仇  
埒其咎尤 庫其執對 皆當首謝 即  
誦此經

清微藏書閣

天尊言 天官符 地官符 年月日時  
各有官符 方隅向背 各有官符 大  
則官符 小則口舌 是有赤口白舌之  
神以主之 凡諸動作興舉 出入起居  
不知避忌 如遇官符口舌 則使人  
擊聒 曉夜煎譎 多招唇吻 面是背  
非 動致口牙 盟神詛道 始於謗讟  
終於詬詆 由是獄訟生焉 刑憲存  
焉 若欲脫之 即誦此經 遂得口舌  
潛消 官符永息

天尊言 土皇九壘 其司千二百神 土  
侯土伯 土公土母 土子土孫 土家  
眷屬 若太歲 若將軍 若鶴神 若  
太白 若九良 若劍鋒 若雌雄 若  
金神 若火血 若身黃 若撞命 若  
三煞 若七煞 若黃旛豹尾 若飛廉  
刀砧 如是等土家神煞 若人興脩卜  
築 一或犯之 即致病患 以迄喪亡  
纔誦此經 則萬神皆起 天無忌  
地無忌 陰陽無忌 百無禁忌

清微藏書閣

天尊言 世人夫婦 其於婚合 或犯咸  
池 或犯天狗 三刑六害 隔角交加  
孤陰寡陽 天羅地網 艱於嗣息  
多是孤獨 若欲求男 即誦此經 當  
有 九天監生大神 招神攝風 遂生  
賢子 於其生產之時 太乙在門 司  
命在庭 或有冤愆 或有鬼魅 或有  
禁忌 或有兇厄 致令難產 請誦此  
經 即得九天衛房聖母 默與抱送  
故能臨盆有慶 坐草無虞 凡有嬰孩

在於襁褓 為梅檀神王座下 一十  
五種鬼 加諸惱害 因多驚癩 宜誦  
此經

天尊言 若人居止 烏鼠送妖 蛇蟲嫁  
孽 拋磚擲瓦 驚雞弄狗 邀求祭祀  
以至影脅夢逼 及於姦盜 而敢據  
其所居 以為巢穴 遂使生人被惑  
庭戶不清 夜嘯於樑 晝瞰於室 牛  
馬犬豕 亦遭瘟疫 禍連骨肉 災及  
孳生 淫祠妖社 黨芘神姦 弔客頻

清微藏書閣

仍 喪車疊出 若誦此經 即使鬼精  
滅爽 人物咸寧

天尊言 九天雷公將軍 五方雷公將軍  
八方雲雷將軍 五方蠻雷使者 雷  
部總兵使者莫賺判官 發號施令 疾  
如風火 有廟可伐 有壇可擊 有妖  
可除 有祟可遣 季世末法 多諸巫  
覘 邪法流行 陰肆魘禱 是故  
上清 乃有天延禁鬼錄姦之庭 帝猷束  
妖考邪之房 能誦此經 其應如響

天尊言 天瘟地瘟 二十五瘟 天蠱地  
蠱 二十四蠱 天瘵地瘵 三十六瘵  
能誦此經 即使瘟心清淨 蠱毒消  
除 勞瘵平復 亦有其由 或者先亡  
復連 或者伏屍故氣 或者塚訟墓注  
或者死魂染惹 或者屍氣感招 凡  
此鬼神 或悲思 或恚恨 牽連執證  
並緣注射 乘隙伺間 乃得其便  
故誦此經者 上通三天 下徹九泉  
可以追薦魂爽 超度祖玄 太上遣素

車白馬大將軍 以監之  
天尊言 若或有人 冶裝遠行 寇盜騁姦  
五兵加害 陸行 即虎狼魍蜮磨其  
牙 水行 則蛟龍鼉鼉張其頤 或灘  
瀨有幽枉之魂 或風濤有劫數之會  
前亡後化 捉生代死 能於此經 皈  
命投誠 故得水陸平康 行藏叶吉  
天尊言 亢陽為虐 雨澤愆期 稽顙此  
經 應時甘澍 積陰為厲 雨水浸淫  
稽顙此經 應時朗霽 祝融扇禍

飛火民居 赤鼠遊城 驚熱黎庶 此  
經可以禳之 海若失經 魚鱉妄行  
洪水稽天 民生墊溺 此經可以止之  
天尊言 世人欲免三災九橫之厄 即於  
靜夜稽首北辰 北辰之上 上有三台  
其星並躔 形如雙目 疊為三級  
以覆斗魁 是名天階 若人見之 生  
前無刑囚之憂 身後不淪沒之苦 斗  
中復有尊帝二星 大如車輪 若人見  
之 留形住世 長生神仙 皈命此經

投心北極 即有冥感 斗為天樞  
中有天罡 在內即為廉貞 在外則為  
破軍 雷城十二門 並隨天罡之所指  
罡星指丑 其身未 所指者吉  
所在者凶 餘位皆然 若人見之 壽  
可千歲  
天尊言 世衰道微 人無德行 不忠君  
王 不孝父母 不敬師長 不友兄弟  
不誠夫婦 不義朋友 不畏天地 不  
懼神明 不禮三光 不重五穀 身三

口四 大秤小斗 殺生害命 人百已  
千 奸私邪淫 妖誣叛逆 從微至著  
三官鼓筆 太乙移文 即付五雷斬  
勘之司 先斬其神 後勘其形 斬神  
誅魂 使之顛倒 人所鄙賤 人所嫌  
害 人所怨惡 以至勘形震屍 使之  
崩裂 驅其捲水 役其驅車 月覈旬  
校 後有考掠 一聞此經 其罪即滅  
若或有人 為雷所瞋 其屍不舉  
水火不受 即稱

九天應元雷聲普化天尊 作是念言 萬  
神稽首 咸聽吾命  
天尊言 此經功德 不可思議 往昔劫  
中 神霄玉清真王長生大帝 所曾宣  
說 至士授經 皆當剗金置幣 盟天  
以傳 雷師皓翁 長跪拜興 重白  
天尊言 是經在處 當令土地司命 隨  
所守護 雷部按臨 以時稽審 若人  
家有此經 至誠安奉 即得祥煙滿庭  
慶雲蔭軒 禍亂不萌 吉福來萃

於其亡歿 不經地獄 所以者何 死  
即往生 生歸善道 承

天尊力 有此靈通 出入起居 佩帶此  
經 眾人所欽 鬼神所畏 遇之險難

一心稱名

九天應元雷聲普化天尊 悉得解脫 於

是 雷師皓翁 對

天尊前 而說偈曰

無上玉清王 統天三十六

九天普化君 化形十方界

披髮騎麒麟 赤腳躡層冰

手把九天氣 嘯風鞭雷霆

能以智慧力 攝伏諸魔精

濟度長夜魂 利益於眾生

如彼銀河水 千眼千月輪

誓於未來世 永揚天尊經

雷師皓翁說是偈已

天尊言 此經傳世 世人未知 吾今所

治 九天應元府 府有九天雷門使者

以糾錄典者 廉訪典者佐之 復有

四司 一曰掠剩司 二曰積逮司 三  
曰幽枉司 四曰報應司 各有大夫以  
掌其事 吾之所理 卿師使相 咸贊  
元化

天尊說是經畢 玉焚七寶層臺 天花繽  
紛 瓊香繚繞 十方諸天帝君 咸稱  
善哉 天龍鬼神 雷部官眾 三界萬  
靈 皆大歡喜 信受奉行  
九天應元雷聲普化天尊說玉樞寶經竟  
唵吽吒唎嚩嘽囉

清微藏書閣

完經讚

九天雷祖一炁分真 觀遊初六及三辛  
隨處鑒良因 歷劫度人 不順化微塵

皈命

雷聲普化大天尊

普化寶誥 志心皈命禮

九天應元府 無上玉清王 化形而滿十  
方 談道而跌九鳳 三十六天之上 閱  
寶笈考瓊書 千五百劫之先 位上真  
權大化 手舉金光明如意 宣說玉樞寶

經 不順化作微塵 發號疾如風火 以  
清靜心而宏大願 以智慧力而伏諸魔  
總司五雷 運心三界 群生父 萬靈師  
大聖大慈 大悲大願 至皇至道  
九天應元雷聲普化天尊。。  
九天應元雷聲普化天尊說玉樞寶經竟

天運辛卯年亥月

正一天師清微弟子洪鼎堅恭錄彙編

九天應元雷聲普化天尊說玉樞寶經

清微藏書閣

